

SECONDA SESSIONE URDINARIA DI U 2020
RIUNIONE DI I 26 È 27 DI NUVEMBRE DI U 2020

2EME SESSION ORDINAIRE DE 2020
REUNION DES 26 ET 27 NOVEMBRE 2020

2020/O2/043

**Question orale déposée par M. Petr'Antone TOMASI
au nom du groupe « Corsica Libera »**

OBJET : Insignamentu immersivu.

O sgiò Presidente,

O sgiò cunsiglieri in carica di a lingua corsa è di l'educazione,

Mentre sta sessione, a nostra Assemblea hè chjamata à esaminà dui raporti in leia cù l'imparera di a lingua corsa per via di l'immersione.

Si sà quant'è u sviluppu di issu modu di tramandera di a lingua hè impurtante in quant'è à a crescita di a sparghjera è di l'usu di una lingua minurata.

Intantu, ùn ponu esse cà salutati i mezi chì saranu aduprati in sustegnu à i centri d'accolta di Savaghju, di L'Oretu è di Campanari è a nutizia bella di l'apertura di una scola materna immersiva in Bucugnà.

Eppuru, di modu generale, l'insignamentu immersivu in Corsica avanza à passi minuti, quandu chì u Statu ùn piglia à l'arritrosa, malgradu l'impegni chjappi.

In u 2016, eranu cusì firmati u CPER (cuntrattu di pianu Statu-Regione) è a cunvenzione « lingua corsa » cù l'impegnu scrittu di dà forza è fiatu à l'insignamentu immersivu, dunque aldilà di a parità uraria trà u corsu è u francese.

Dipoi, a pusizione pulitica di u governu francese nantu à a quistione di l'immersione hè quella di un rincullu, per a lingua corsa è dinù l'altre lingue, di u rinecu di a parolla data è ancu firmata.

Qualchì esempiu, à a lestra :

- In 2019 davanti à u senatu, a ministra Jacqueline Gourault cunsiderava pubblicamente l'insignamente in immersione cuntrariu à a custituzione.

- À a riintrata 2020, in Ipparalde (Paese Bascu Nordu), l'Accademia di Bordeaux s'upponia à l'aperture di nove scole immersive, fendu valè a legge Blanquer di 2019 chì rende a scola ubligatoria à partesi da 3 anni. Ci hè vulsutu a mubbilizzazione unitaria è dicisa di a sucetà basca per mantene una pulitica d'apertura di sitti immersivi.

- In Corsica, à a riintrata 2020 non solu ùn hè stata aparta mancu una scola nova in immersione, ma sò stati denunziati da parenti e rialità di scole bislingue... senza insignanti cursofoni. E famose scole « indifarinziate ».

- Solu in Corsica suttana mancherianu 70 maestri bislingui. Dipoi anni è anni, l'Educazione naziunale ùn hè mai stata capace à ricrutà 50% di maestri cursofoni, assai sott'à i scopi di a nostra Assemblea è di l'ingaggiamenti firmati da u Statu.

In issu ambu, favurevule pocu à e pulitiche immersive, ghjunghjenu à fine u CPER è a cunvenzione « lingua corsa ».

O sgiò Presidente, o sgiò cunsiglieri, à chì ne simu tandu di i neguziati nantu à stu puntu è di l'iniziative almanaccate da a Cullettività in quantu à l'educazione immersiva cù u Statu, o senza ellu ?

À ringraziavvi.